

百名家詩選

小引

魏子曰余客衛源寓蘭若自夏徂秋寂坐澄觀  
日撫古栢八九株而已忽楚中王雪洲先生簇  
車馬排竹戶而入晤對三晨夕出其詩見示新  
穎雋逸不屑屑步趨古人初讀之如月下梅花  
香影不可卽離再讀之如帳中佳人情貌皆有  
實際熟讀之如聽成連鼓琴忘乎其爲天空海  
大時也朕雪洲由詞林陟諫垣建牙山左以杭  
直忤時而其詩寄托遙深絕不露侘傺無聊之

概宋荔裳觀察比諸三閭大夫謂其目成于美人含睇于山鬼纏綿徘徊超忽悄恍有不自知其何心者可謂雪洲知己矣余急攜其詩向山巔水滑雲岑烟樹間一洗繁縟焉惜叱馭之速不及盡登罪余手腕矣

百名家詩選

福清魏 憲惟度輯選

華亭張一鵠忍齋 長洲錢中誥宮聲

黃岡程啓朱念伊 休寧孫 默無言 叅

王追騏 字錦之號雪洲黃岡人

小孤山

渺質托孤舟曠懷寄海表留柱屹中流層巒俯  
衆眺造物豈神奇片青能縹緲問向小孤石不  
棲大鵬鳥蒙葺僧寺隱明滅燈龕小旅月共悠

悠離魂自悄悄何時巔上跌披雲待暮曉

潯陽舟中同姪子雲作

潯江風驟雨風驟雨遲遲舟撼濤愈沸聲催意  
俱馳肝隔中宵語骨月豈盡知遷客久無淚處  
士尚有詩世薄仇睚毗賦罷怨江離修怨要天  
損蒼冥鑒在茲痛哭無家別別我莫相思

客夜聽雨

聽雨疑落葉颯沓扣窗紙側耳逐風聽葉落雨  
聲裏嚴威凜若箭激烈迅如駛薄衾傲長夜遊

子念故里深閣知未知我在空山委

落葉

生理甚艱難何忍紛紛落北風太不情入山任  
肆虐飄零故相依聚散靡所托恨無松栢榦歲  
寒仍舊穉待學桃李枝乘春先發萼物序豈殊  
懸葉葉請自度

兵山感懷

有客西南來離家二千里及茲秋徂冬羈棲靡  
所止翹首望故鄉霜雪盈眼底暗窺天地秘靜

識藏身理湖海波太急居山莫居水秦漢俗已  
薄讀經莫讀史感慨只自知情結中夜起夷跣  
名何在彭殤身俱已大道絕兩端千載慎一死  
維彼賢達人陶朕悟太始

雨中遣愁

沈陰欲結愁先故密爲雨爲雨未終朝結愁已  
千縷人生役悲歡肝腸不自主寧忍百年身竟  
爲愁所苦因之發浩歌按劍徐起舞劍光烈以  
寒歌聲復詡詡靡我不知愁愁亦奚所補

乙巳秋七月壽映狀子

幽人致宜秋清秋興宜月月上秋山顛照人採  
微蕨薇蕨化金光奇芬流秘釅香亦不可磨光  
亦不肯歇赫耀千載內人與月同揭

題美人秋夜聽笛

月暗砧響停風肅蟲語悄側耳空外聽何處秋  
聲早激徵與悲商楚楚傷懷抱未知吹者心聽  
者情如稿豈不纏綿思思深人易老

八月十七日



此日泣不歌今夕歌當泣反側窺明發含悽憾  
罔極腸枯歌無聲痛久泣無力金風萬山中百  
感奔胸臆持茲訴明月細雨圍如棘

述夢

夢山不知名夢中遊且喜景物杳難似想像尚  
可擬石影插上天松聲落在水纔出危磴外又  
掛深篁裏忽見羽衣人顧予笑不已爲詢人間  
事只向峰前指舉首望峰前跳號唯鹿豕此意  
殊恠哉此夢胡爲爾

送孫無言歸黃山

還山吟風雨作歌山水音  
淒以清兮高且深空  
中巖壑何所見歌者爲歌還  
山心海天莫莫泛  
浮鷗出岫流雲古及今  
華山半席徒懸爾輞川  
全勝杳難尋隱鱗藏羽事  
殊艱超世何妨任陸  
沉有客邢州十六載闔門  
著書行不改瓊花臺  
畔迷樓前憑吊千秋自磊磊  
何因忽起黃山情  
一似黃山舊有盟浮丘公  
自何年別今將採藥  
問容成玉壺珠函猶在否  
仙家風味應不朽洞

口松風問信來三十六峰皆我友懷友方知別  
友難還家不似無家醜君茲歸去漫勞勞籜冠  
芒屨道人袍澗外風湍崖下月知誰更聽廣陵  
濤吁嗟乎吾道栖栖思不禁爲君喜賦還山吟

姑蘇臺

闔閭伯吳事壯哉夫差雄舉非不才鏤宮飾館  
金玉濺泥沙只委越人材世有奇物妒者多炎  
帝攘之亟相摧何代宮闕不丘墟人胡獨笑姑  
蘇臺姑蘇臺狀誰睹記千載作歌詈驕恣龍蛇

勢布本王居穿池洗舟尋常事惟道館娃閣太  
豪從來金屋貯阿嬌荒淫或嫌長夜飲無如歌  
舞人相招雄視高臺掖齊楚豈期臣妾非心膂  
潛師偃戈渡江來不惜勝遊供一炬水號兇兮  
山躍鯉變幻總是興亡理莫向繁華怒吳主祇  
惜荒丘吳臣死臺焚千古哀傷心豈爲此  
遺址當年血熱屬鏤劍今日光寒吳越史吁嗟  
乎君不見亭亭昂昂挾目人請看姑蘇臺上月  
長明

紀夢

昨夜三更後輕帆忽見家  
奚童開竹徑稚子說  
燈花舊醺如將發寒衣  
尚未加側身仍道院山  
靜月空華

月夜懷十弟

越國嗟行役栖栖弟與兄  
况當憂患日復起別  
離情空館人孤立霜天雁  
一聲如何寒夜月偏  
向客中明

吳山醉中咏梅

愁人凝醉眼黯黯着梅花庾嶺雖多派羅浮未  
有家暗香宜自媚孤質竟誰誇含蕊神偏壯幽  
朕待雪華

老樹

溪山多老樹此樹更忘年情淡峰前月神凝雪  
後天枝枝春意在歲歲道心堅幾閱滄桑盡淒  
朕覺汝賢

盆梅

繪月莫繪魄畫梅須畫影夜殘伴孤燈虛虛掛

疎梗不聞梅蕊香祇覺梅風冷醉眼望石盆神  
已到庾嶺

獨酌

消夜恃尊酒酬杯借月華漫將歌當泣一任客  
爲家自笑懷荆璞誰能贈莫邪醉餘形顧影爾  
亦在天涯

薔薇

小架舒長蔓輕風回細香高低隨綴采深淺各  
施妝含露偏多艷迎霞倍有光爲憐春色好偷

影過隣牆

吳山念十弟閩遊不歸

閩越遙相憶淒淒俱楚吟  
尊前孤月影夢裏兩人心  
幽室昏方旦浮雲古及今  
懸憐畱滯者寧爲惜知音

庭桂初發值雨

翠竹蒼峰裏窺圍幾樹黃  
春華方逞艷漬雨不成妝  
竟老秋闈夢空傳月殿香  
淮南招隱句三復倍淒涼



攜李道中十弟先期旋里口占賦別

去去毘陵道依依攜李城  
寒江顏色少歸雁羽  
毛輕先慰高堂意徐傳遊子情  
分攜何所贈苦  
調寄同聲

男兒無別淚多半是吞聲  
憂患經年夢悲歌永  
夜情感因秋自重愁向月同明  
漢水吳山上相  
應憶弟兄

貞娘墓

吳中多恠事有妓喚貞娘墓尚傳青史魂猶禮

楚王懸知名士骨不及美人香歎息荒丘上迷  
離春草長

毘陵客夜寄懷錢宮聲

男兒感意氣不語自情深飄泊仍吳棹淒清是  
楚吟未知孤夜月曾繫幾人心同調分天際爲  
君待鼓琴

雨望

閒窗暮雨遠峰低揚翩摩空鶯亂啼暫醉身忘  
畱古院曠遊夢不到深閨何因四野俱簫管可

是中原罷鼓鼙難負湖山春色早陰晴都費郢  
人題

吳山正月十五夜咏懷

三年燈火戲沙堤不謂風輪到浙西  
燕市踏歌猶繫夢吳山醉月莫輕題  
虹橋綵競星辰隱玉漏聲高絲管低  
似我今宵唯痛飲恐教病骨照青藜

玉蘭花和韻

梅殘自覺興全殊又見迎春映玉壺  
香色若隨

題處有丰神還擬畫中無唐人只解辛夷咏北  
地仍將木筆呼綬綬芳容誰得似寫從山谷浣  
花圖

燈詩次沈繹堂先輩咏

卽戎裝美人燈

雉尾斜輝寶劍長深閨游俠漫登塲渾忘身幻  
空中相只欲人傳巧樣妝玉質自甘風骨冷丹  
心不讓月輪光亭亭醉舞筵前影錯認當年巖  
下郎

東槩菴熊和尚

二十年前早識君  
兒童曾聽說雄文  
待窺瀛海潮頭月  
猶隔華山頂上雲  
此際傳燈寧自照  
當年諫草爲誰焚  
好畱半席遲來客  
莫學希夷不肯分

儒禪樹幟覺誰真  
月散千峰共一輪  
曾笑坡公原衲子  
還疑佛印本詩人  
梵鐘直破三更夢  
史筆能畱萬古春  
門外何從分世界  
如君與我後先身

古錫山房同錢宮聲姜西銘朱懋昭陳行

一余澹心王忠宇白大生柯烜菴于伊  
身柳敬亭僧就閒妓峽雲湘疑看牡丹  
小飲次余澹心韻

姑蘇春煥洛陽紅群逞風流到梵宮詞賦客爭  
誇粉黛平康人慣識英雄移來國色金尊影收  
去天香玉帳風遙惜明年花再發花前高唱幾  
人同

題美人春睡

山中鶴夢閒江上鶯花冷俱爲春闥裏含凄待

寫影

初夏客中漫興

人向花前老  
春從客裏歸  
起看新綠影  
先上旅人衣

隔院見山茶

動問寒芳獨  
數梅海紅不  
肯讓梅開輕  
飄遠艷  
千千朶  
恰照離人酒  
一杯

江西忽見滇  
南花楚客行  
吟天一涯幾  
度惜花  
還自惜憐予  
與爾俱非家

小引

魏子曰讀詩如聽琴焉宮商按節疾徐式度使  
天下有心人聆其飄緲之音神怡色喜不必于  
海天空廓山水恬寂時皆有不能暫忘之意斯  
其詣畀之天而全之人非旦夕可爲功余每讀  
素園先生出門吟輒作此想丁未出都止白門  
一刻其詩辛亥遊雲間棹三泖再刻其詩心悅  
而好之恐不得當也近過衛望建牙氣色抑抑  
溫溫有輕裘緩帶風屬僚咸師其意俾所治如



登太古絕不見晚近囂凌之習昔人謂衛多君  
子子魚伯玉輩皆能澡飭其躬而不知浴沐干  
洪輿詩人金錫圭璧中者久而莫知其狀也則  
先生之詩寧特出門有功哉吏治文章品節操  
行皆從可識矣昨過蘇門訪孫公和嘯臺萬籟  
松濤與百泉振響恍阮嗣宗下山時聞空中響  
鳳聲笑謂友人吳星若曰廣陵散于今絕矣此  
琴心何來因相與步月庭中出先生詩一朗吟  
忽又移我情于海天空廓山水恬寂時也先牛

其餘之成連也乎昔壬子初秋十有二日

百名家詩選

福清魏 憲惟度輯選

秀水曹 溶秋岳 睢陽湯 斌孔伯

晉江吳愈聖梅麓 商丘徐作肅恭士 叅

李贊元 字匡侯號素園龍溪人

古意

武侯無三顧躬耕在南陽呂望非後車礪溪亦  
潛藏由來名世士遇合在霸王如何智伯滅豫  
讓乃自戕士爲知己死主恩安敢忘精誠貫日

月千載有耿光  
嗚呼卞氏璧  
抱泣荆山傍  
至寶題爲石  
古今同歎傷

淮陰推強項  
武安霸西秦  
英氣掩白日  
奇勲動鬼神  
一旦遭殺戮  
骸骨成灰塵  
勢盈天所忌  
功大不謀身  
所以富春叟  
桐江理釣緝  
晞髮高崗上  
濯足溪水濱  
干戈自搶攘  
偃息全吾真  
嗟嗟千駟富  
孰若採薇貧

長安雄勝地  
自古帝王州  
冠蓋半都邑  
赫赫公與侯  
鳴騶交紫陌  
紅日隱高樓  
酣歌窮日夜

管佐珍羞誰憐楊執戟蕭朕着敝裘閉戶獨著  
書門無長者游倏忽陵谷改臺榭成荒丘太玄  
垂千禩竟與金石儔立言古所貴貧賤安足憂

又

古風難復作交道久已虧雖結紵編好戈矛亦  
相隨魏卿魏卿相宅門庭皆故知一朝權勢去腹  
心生別離蕭朱始定交皓首同所期如何末路  
變按劍互見欺管鮑沒世遠遺踪不可追吁嗟  
翟廷尉此語將告誰

雷發蟄虫振春來百草萌升沉皆有節蹀動祇  
自傾傳說佐殷宗相業亦已宏物色苟未遇版  
築竟何成鳳凰棲枳棘徒爲燕雀輕英雄不得  
勢何以垂令名

漢高方用武陸賈勸修文叔孫強議禮綿蕞遂  
紛紛諸儒抱六經掇拾亦已勤區區成何事何  
如衛霍勲謝艾少書生白帽戲趙軍折衝在樽  
俎老儒竟未聞

直木先自伐膏火乃自煎神龍貴藏首物類皆

已厭叔夜倜儻士豪氣掃雲烟才高識亦寡身  
名遂不全倬哉黃叔度養晦在幾先汪汪千頃  
波當時稱聖賢

四時有代謝芳華無久好春來草木榮秋至亦  
枯槁纍纍北邙山白骨覆古道人生非神仙安  
能長壽考登高望瀛洲流水何浩浩中有不死  
人逍遙在蓬島朝飧流霞漿夕吸玉紅草欲往  
河無舟憂愁以終老

青青松與栢植根澗水傍不華亦不實偃蹇自

低昂東園桃李樹春至吐芬芳姿顏嬌且麗顧  
盼生輝光良辰難久得北風乃飄颺倏忽繁華  
落道路咸歎傷獨有松栢枝蔥翠如故常悲哉  
長門婦色衰空淒涼

千金買騏驎價重如連城一旦駕鹽車逐隊嶺  
上行逡巡氣凋喪幾爲驚馬輕鞭策馳遠道騏  
驎乃長鳴瞬息千里至追電寂無聲斯時群馬  
伏俯首不敢爭御馬貴有道如何違其情造父  
沒已久嘆息淚縱橫



舟中感懷

我來燕都久形神惡羈束汎棹向南遊路紆水  
迴腹所幸舟楫遲山川恣極目遠眺望平疇稻  
梁固比屋楓柳垂林隈群鷗陌上宿花鳥何安  
生樂郊各止足對此淳樸風庶幾上古俗胡爲  
故鄉土征求日急蹙虎狼滿街衢談笑用鞭朴  
連村無鷄犬怨聲及草木采薇供饗殮終日不  
盈掬煌煌冠蓋居但見礫與蓼誰不愛兒女朝  
生暮卽鬻迓竄徧異鄉神鬼乏糜粥生離旣悲

號死竟亦慟哭仁愛上天心此方獨傾覆予豈  
不懷歸欲行常跼促何以救斯民所望在良牧

村酒行

長道老風霜我身亦淒涼村中無好酒獨坐對  
空觴此村罹兵革田疇久已荒我行阡陌間荆  
棘遙相望藜藿苦未給何以佐壺漿况乃誅求  
逼鞭朴勢蒼黃嗟彼豪貴里玉戶繡朱梁絲竹  
已滿座旨酒亦成行日暮酣歌起日出猶未央  
胡爲此方民百憂愁我腸盛衰固有運哀樂亦

有常達人貴察變戒之慎勿忘

俠客行

長安遊俠客結識徧四方夜宿邯鄲肆日馳白  
驕驕門下多死士衣履珠玉裝千金買寶劒淬  
礪日光鐸射獵上林苑殺人燕市傍百萬酬知  
已一飯不敢忘解兵用談笑抵掌屈侯王小哉  
秦舞陽獻圖乃倉皇請纓事戎伍何論殺與傷  
男兒死牖下白骨汚山岡

燕道難

古樹寒鴉啼夜秋隄邊玉露壓花流白日沙飛  
天路暗空餘明月照蒿丘蒿丘白骨覆古道嘖  
嘖蜚虫泣荒草薄暮山鬼笑語聲寒霜入鬢朱  
顏老君不見燕昭斷壙久生苔燕滿離宮兔滿  
臺玉花氣折鹽車下天駟無光夜色哀蕭蕭易  
水落長虹羗笛橫吹木葉空搔首爲弔荆高客  
黑雲驟雨來悲風

採蓮曲

江南水漲六月天蘭舟桂楫滿江邊愛花窈窕

誰家女艷服祓粧共採蓮蓮花爛熳照羅衣棹  
入蓮蓼畫艇微忽聞笑語花間出驚起鴛鴦水  
上飛自從夫婿入長安深閨獨守夢覓卑隣家  
女伴來相喚隨入蓮塘步又難採蓮採得並蒂  
枝儂家心事空自知夫婿遠征誰寄去傷心無  
語立江湄

任城太白樓

謫仙浩氣塞九州縱橫古今誰與儔幸有任城  
賀使君慷慨同登城上樓任城樓閣照奎婁四

際群峯一望收。畫棟上接雲漢影。曲欄俯瞰大  
河流。使君意氣高天下。觥籌雜遝相獻酬。知已  
相逢爲君飲。意中寧知公與侯。憶昔金鑾殿上  
遊。大官供俸進珍羞。典酣揮灑如風雨。筆掄五  
嶽凌滄洲。可憐謫仙雲馭遠樓門。寂閉日悠悠。  
山川若無高士跡。臺觀芳草亦空留。安得兩賢  
千載在。狂歌長破碧江秋。

姑蘇臺弔古

吳王霸圖久灰滅。吳王樓臺亦摧折。我行吳門

弔吳宮感慨興亡欲鳴咽憶昔當年築臺日征  
徃幾竭萬家室星霜苦作尚嫌遲老弱顛踣誰  
復恤高臺崔巍欲接天府映湖光勢若連萬戶  
千門懸翠麗錦障圍中列管絃吳宮美女顏如  
花響邊行雲舞落霞蟬鬢蛾睂爭鬬艷不知嬌  
龍榻誰家牙板疊催曲屢變銀河影沒正酣宴  
敵兵已渡越來溪君王尚醉鴛鴦殿可憐瑤臺  
貯綺縠一炬烟銷走麋鹿吳中士女共笑歌子  
胥忠冤地下哭故宮舊路久已迷流水瀾漫野

草萋香逕屨廊何處問百花洲畔杜鵑啼由來  
久盛不可期狐兔亦上越王居只有姑蘇臺上  
月曾照西施歌舞時

延津古劍行

延水溪頭日色西江楓樹上烏夜啼自言能記  
昔年事含詞未吐風淒淒憶昔豐城鑄劍年良  
工百煉老飛燵月脊霜鋒未出匣浮光已照斗  
牛邊西江王氣無長在化入延津變光彩碧水  
奔騰波浪驚空山霹靂妖魑收此劍相傳今已



失黑雲欲障半天日牧豎曾遊上苑宮荆榛忽  
滿萬家室聞道當年漢代昌帝子三尺入咸陽  
誰虞一夜長安火未央翻作麋鹿場我聽此言  
感嘆頻漁舟暮雨泣霜燐玉樓燕子飛飛去空  
對楊花愁殺人

春日江村雜興

春野一天晴惠風柔以平故巢來舊燕弱柳戲  
新鶯樹暝多秋氣樓高皆夜聲老農時共醉別  
後不知名

風輕宿霧收  
春色滿平疇  
野樹多穿屋  
溪花不礙舟  
雨餘山疊翠  
雪後水添流  
何事子喬鶴  
翱翔遍十洲

溪水自潺湲  
春來不閉關  
空江月出早  
靜樹鳥歸閒  
潮到將吞岸  
雲飛欲動山  
悠哉頻眺望  
長嘯不知還

春日象山山莊

久厭風塵色  
深林且閉關  
泉聲帶月靜  
松影入窗閒  
初雨新芳草  
殘雲續斷山  
日斜青嶂外  
谷

鳥自飛還

獨坐晴樓上林巒四望分  
樵歌烟外出猿嘯夜  
中聞花氣常通水禽聲  
半在雲脩脩塵境外  
康鹿亦同群

群峯當戶牖積翠落庭陰  
不入此中路安知物  
外心石橋通澗細煙火  
傍山深爲語武陵叟  
桃源尚可尋

春到千峯秀雨收萬壑晴  
日看青草變時對白  
雲生燕語空山響花開  
遠樹明長吟松月下傳

酒此中傾

盤泉逢雨漲種藥傍春長  
葉掃還留影花殘不斷香  
寒鐘搖晚寺弱柳動斜陽  
夜靜孤燈隱風生枕簟涼

未央宮

故殿久成荒空鐘在建章  
寒烟生廢井蔓草上枯楊  
苔鎖朱門暗虫飛畫閣涼  
寥寥秋苑內明月爲誰光

道傍殘柳有歎

嚴冬草木衰嗟彼白楊枝憔悴在今日芳華異  
昔時葉稀承露少絮落到鶯遲欲待扶疎至春  
風報汝知

大寧寺臥佛閣

睡臥高樓上寂狀長閉關形聲皆是累視聽亦  
空刪枕上乾坤靜夢中歲月閒片塵飛不到明  
月滿空山

雨花臺

昔日談經地今朝牧馬墟堪憐一片土尚說六

朝餘雲落遠山出臺荒古木疎感懷非一事臨  
眺獨踟躇

錢塘觀潮

晚棹寒舟下奔潮萬里鳴乍昏千岸影遙壯一  
江聲流急青峯亂濤飛綠樹平閒將滄海興坐  
看片帆輕

劍浦舟中

流水別鄉夢春風送遠征千峯非一色萬瀨只  
同聲棹向晨鐘發舟連岸草行嶺猿知客意莫

向此時鳴

落花詩

春色將歸不忍看  
飛絲落絮已闌珊  
因風吹繞朱簾暗  
帶雨輕沾繡閣寒  
羯鼓頻催難再發  
金鈴長護亦隨殘  
相逢又是他年事  
坐對銷魂獨倚欄

廣陵道中逢友人黃君竹以倦遊歸隱賦  
此贈別

久客頽頽懶問津  
蕭蕭衣帶畏逢人  
桐溪錦釣

長辭漢楚水桃花亦避秦雲到江頭帆影濕雨  
過嶺上馬蹄辛風烟欲斷欄河路莫怨空山草  
木貧

雨晴

昨夜淒風吹我寒荒郊竹屋雨聲殘一朝日散  
平疇淨滿道沙飛落葉乾未雨不知晴日好新  
晴方覺雨時難疎雲已盡高天大且向長原放  
眼看

春日偕同年陳兵憲綠厓暨金陵諸友遊



宿牛首山

春風布煖一天晴  
陟險登崖策杖行  
幽閣倒垂危堦影  
層巒暗度細泉聲  
江流遠近雲中過  
山勢低昂雨後明  
佛火熒熒僧未卧  
蒲團坐月夜三更

端午秦淮

金陵佳氣入江春  
兩岸芳華動翠蘋  
白下湖山千載舊  
天中風日一朝新  
碧潭倒照青樓影  
錦瑟空愁白髮人  
王謝風流今已去  
倚欄悵望獨

傷神

金陵懷古

六代爭雄據石城  
地形蟠踞浪傳名  
人謀不在金湯固  
天塹已隨歌舞傾  
殿外銅駝荒草滿  
陵前石馬暮雲橫  
升沉代換渾如夢  
杜宇魂銷淚幾聲

過烏衣巷故里

徘徊往事欲傷神  
閨閣銷沉淮水濱  
屋有夜烏啼樹冷  
梁無舊燕落泥新  
空聞江左衣冠地  
不

見風流王謝人寄語行人休嘆息晉家陵寢亦  
灰塵

秋日山中有感

萬壑秋聲落葉繁蕭蕭風雨一天昏百季半去  
愁回首四壁空留獨閉門草壓斜橋何處路鴉  
啼殘樹幾家村瘡痍未起親朋散坐對空山欲  
斷魂

翠壁柴門上綠苔無邊雲氣動樓臺四郊烽火  
桑麻盡滿地蓬蒿豺虎來山鬼偏從愁裏嘯林

花何事老時開長溪日暝空流水颯颯風聲永  
夜哀

題林劍鳴山樓

愛此山樓景物清人間臺榭望中輕泉歸衆壑  
參差落日照群峯次第明谷鳥半脚煙際影林  
風不斷夜來聲柴扉寂寂行人少雲色蒼茫嶺  
外橫

脩脩履杖卧雲丘獨踞烟霞百尺樓山翠霑人  
常帶雨松風入谷亦多秋長林日晚樵聲急曲

巡花深鳥道幽卜隱何須方外地桃源已在此  
中遊

莆陽道中

杖策脩舫別舊關江風暮月亦愁顏泉聲欲冷  
谿邊樹日色中分雨後山野火燒時群鳥去白  
雲歸處一僧還故園芳草今何似爲此相思夢  
未閒

釣臺懷古

數代行藏自古今千年一釣此長岑錫符豈屬

功臣福剖竹多疑英主心  
片石封煙觀世靜空  
臺掛壁照江深殘碑半向青苔斷斜倚寒樓獨  
自吟

秣陵春望

江上春來野草萋翠裾綺袖滿長堤  
青山半向雲邊出黃鳥多從雨後啼  
風靜晚汀鷗睡早花殘紫陌蝶飛低  
登高遠眺長干道一望林巒路欲迷

初夏卽事

芳菲搖落送春光  
暖日晴雲晝漏長  
輕葛初裁金剪細  
嫩茶新試石泉香  
風吹楊柳綠垂屋  
鳥啄櫻桃紅過牆  
小院日閒午睡足  
翠樓簾捲夕窗涼

小孤山

小孤山島自乾坤  
四面洪濤日夜奔  
絕壁陡懸天外險  
孤峯特立水中尊  
碧雲入寺鐘聲濕  
白浪橫江樹影翻  
遙望層崖曲逕紆  
何時攜杖到山門

廣陵懷古

隋家天子幸揚州  
綵女歡歌擁御舟  
邗上綠楊纔拂岸  
秦中白骨已成丘  
故宮草發雲空鎖  
舊塚苔封鹿自遊  
二十四橋何處問  
暮猿長嘯野風秋

江村

殘村旅舍動秋思  
木葉蕭蕭岸際垂  
短壁參差依野樹  
蓬門欹側向江湄  
竹橋路細人行少  
弱柳風輕日影移  
老叟倦閒常晝卧  
時牽蔓草補



疎籬

魚舟

數葉輕航江上過  
閒將短楫漾清波  
魚梁水落驚秋夢  
煙雨舟迴起棹歌  
晚簾只堪明月到  
早帆惟挂白雲多  
群鷗日夕沙邊宿  
矰繳未工奈爾何

丁未臘月七日金陵廻光寺遇雪

北風蕭瑟送殘年  
陰雨空濛雪滿天  
澤國有林皆玉樹  
石城無屋不寒煙  
僧歸深院松扉閉  
漁

卷之四十七  
釣空江夜火懸曲徑苔封過客少紅爐綠酒任  
高眠

雪霽後登樓遠眺欣狀再賦

輕風旭日過江城宿霧初收天氣清滿樹凝花  
懸素影長溪殘絮落新聲雲歸浦外晴還濕月  
到樓頭冷倍明大地銀河聊縱望捲簾長嘯一  
樽傾

燕都感懷

古寺寒鴉帶露鳴河橋綠樹落秋英將軍射獵

花邊過公子彈箏月下行  
馴僧塲中多識面黃  
金臺上孰知名漸離故塚蓬蒿滿何處臨風聽  
筑聲

卽席次荅張爾成少叅韻

霓旌獵獵逐風開  
遙看文星自北來  
椽筆應推燕國手  
風流獨數鄴中才  
寒檐露落燈花冷  
古寺鐘沉月影回  
把酒談詩耳正熱  
城頭夜漏莫相催

蕭蕭四壁嘆鷓鴣  
異地懷人問字遙  
遠望轅門

千里隔相逢驛路一尊邀爐中火熱香烟滿秋  
後風高夜雪驕醉讀新詩頻起舞冰綃何必讓  
瓊瑤

都門送孝廉莊儕鶴歸里

知己分離二十年相逢燕市倍淒然何堪握手  
無多日復爾銷魂自各天芳草輕霑江店雨春  
風遙散馬蹄煙長途詩篋君應滿莫向癡人夢  
裏傳

團扇詞

篋中白團扇夏來親郎面願天不復秋長與郎  
相見

寶鏡嘆

繡囊裹寶鏡日夜挂粧臺儂色已憔悴躊躇未  
敢開

鵲鵲啼

寒床寂無語鵲鵲啼向曙如何不早啼郎已出  
門去

長門怨

久隔上林路無意對花開東風不解事吹送苑  
花來

江南曲

妾在橫塘上江湖日蕩漾潮水有去來郎心無  
定向

擬古宮怨

弱柳飄搖百子池大家依樣畫蛾眉鸞車已向  
別宮去妾學新粧誰得知

太液池中菡萏新紅裙搖曳綠波濱無端驚起

鴛鴦鳥陌上雙飛惱殺人

中官宣召按新箏玉指細彈離恨聲却被東風  
吹散去君王乍聽未分明

鸞輿塵遠邈難攀聞道將來尋又還自是君王  
不好色非關薄命盡紅顏

閨怨

妾家住在大江頭江水多情日夜流聞得櫓聲  
樓上看不知何處是郎舟

池畔芳桃郎自栽今朝已見碧花開無情桃樹

開何惡種花主人今未來

懷友人用上下平韻

有小序  
選入首

旅中閉關悶坐偶有意中之思因感歎  
淒涼愴然屬筆不必有是事不必無是  
人也亦猶屈子湘君陳思洛神之義爾  
文不逮意辭未及情覆瓿之譏或者其  
未免乎

煙雨蒼茫鎖碧居千愁莫寄半行書西來青鳥  
羞傳信思欲遺君雙鯉魚



強扶衰杖望重門  
躑躅含愁聲欲吞  
想到無端思夜卧  
却將飛夢訴離魂

愁鬢羞開青鏡奩  
秋風何事欲窺簾  
峩斜千丈峯頭雪  
疑是離人白髮添

洞庭秋水碧雲沈  
帝子中洲何處尋  
玉珮蘭舟愁眇眇  
空留湘竹淚痕深

飛燕猶狀巢故枝  
征夫或有夢歸時  
狂風一起落花散  
兩地傷心兩不知

羅綺翩翩翠袖長  
微風暗送自飛揚  
何時化得

青紅錦裁作君衣猶帶香

金井欄邊絡緯聲寒燈獨聽夢魂驚空幃無計  
成雙影故把頰容月下

浮雲來往不須巢飛鳥長鳴楊柳郊汝自閒情  
我自怨相逢相過莫相嘲

睡起

寂寂僧房睡起遲起來已是早炊時莫云客夜  
全無事夢裏常吟未穩詩

醉後

十千買醉莫辭貧一醉頽然閒此身恨少中山  
千日酒醒來依舊是愁人

過清溪有感

繡戶朱簾紅杏墻風吹蘭麝滿溪香于今已作  
榛蕪路任是無情亦斷腸

和韻遣懷

四載飄搖南北天淒風苦雨亦堪憐黃金散棄  
鬚眉老聊作新詩學少年

代人題畫圖

堦前流水起清音鬱鬱長松正滿岑石壁翠連  
青草色洞門閒鎖白雲深